

HAYATI JIWA, SEMANGAT SEBENAR TARikh 22 JULAI

July 22, 2016, Friday

Borneo Post.

KUCHING: Pada 22 Julai 1963, kira-kira 53 tahun lalu Sarawak telah bebas daripada penjajahan British.

Peristiwa bersejarah itu menyaksikan pengiktirafan yang diberikan kerajaan British ke atas Sarawak untuk mempunyai kerajaan sendiri.

Ia seperti yang diisyiharkan koloni British yang dimulakan dengan pelantikan Ketua Menteri pertama Sarawak Datuk Stephen Kalong Ningkan sambil disaksikan jemaah menteri Sarawak.

Namun, tidak semua rakyat Sarawak termasuk rakyat Malaysia tahu akan tarikh keramat 22 Julai 1963 memandangkan peristiwa itu kurang mendapat publisiti sebaliknya lebih memfokuskan 16 September 1963 iaitu tarikh Sarawak dan Sabah menyertai Malaysia.

Justeru, 22 Julai yang diisyiharkan cuti umum bermula tahun ini atau dikenali sebagai Hari Sarawak merupakan langkah penting yang wajar sebagai memperingati detik-detik Sarawak bebas daripada cengkaman pentadbiran British selama 113 tahun.

Malah, keringat dan pengorbanan para pejuang terdahulu tidak harus dilupakan yang selama ini membawa kepada kejayaan besar Sarawak dan rakyatnya.

Inisiatif Ketua Menteri Datuk Patinggi Tan Sri Adenan Satem yang mengisyihar tarikh cuti umum itu turut diterima baik oleh seorang ahli akademik, Profesor Madya Dr Jeniri Amir dengan menyifatkan walaupun agak kontroversi tetapi ia perlu disambut.

“22 Julai penting dalam konteks pengiktirafan para pejuang kita...maka sambutan Hari Sarawak ini sangat bermakna untuk mengekalkan semangat kebersamaan dalam kalangan rakyat berbilang kaum di Sarawak.

“Selain itu, ia juga akan dapat meningkatkan kesedaran tentang kepentingan sejarah agar semua orang khususnya rakyat Sarawak sendiri sedar episod tertentu mengenai sejarah

Sarawak yang sangat tidak dipedulikan selama ini,” katanya ketika dihubungi di sini, semalam.

Dalam pada itu, Jeniri berkata pengisytiharan Hari Sarawak juga menambahkan lagi keistimewaan Sarawak sebagai sebuah wilayah yang meraikan tiga tarikh untuk tujuan sama.

“Perlu diingat, Sarawak adalah satu-satunya di dunia yang meraikan tiga tarikh iaitu 22 Julai (Hari Sarawak), 31 Ogos (Hari Kebangsaan) dan 16 September (Hari Malaysia).

“Maka kita ada tiga cuti umum untuk meraikan tarikh-tarikh bersejarah ini,” katanya sambil berharap agar kerajaan negeri dapat meraikan hari-hari yang memberi makna kepada Sarawak itu dengan lebih signifikan.

Manakala Timbalan Naib Cancellor Universiti Malaysia Sarawak (UNIMAS) Profesor Mohd Fadzil Abdul Rahman berkata pengisytiharan tarikh 22 Julai sebagai Hari Sarawak adalah satu manifestasi tersendiri yang sudah pasti memberi nilai tambah dan meniupkan semangat ‘Sarawak untuk rakyat Sarawak’.

Selain itu, katanya tercetusnya keputusan tersebut juga adalah dipengaruhi melalui pendekatan serta hala tuju yang dibawa oleh pemimpin masyarakat dan negeri yang melihat hari berkenaan sebagai satu hari yang sangat signifikan dalam sejarah Sarawak yang difikirkan perlu diberi pengiktirafan sewajarnya.

“Keputusan ini sudah pasti dapat mengukuhkan lagi usaha yang dilakukan oleh kerajaan negeri bagi mewujudkan rasa kekitaan dan membakar semangat patriotisme terhadap Sarawak di kalangan rakyat Sarawak terutama generasi muda sebagai pewaris Bumi Kenyalang.

“Ini juga dilihat selari dengan aspirasi kerajaan negeri dalam memperkasakan semangat ‘Sarawak untuk Rakyat Sarawak’ yang menjadi satu ledakan baharu pada era pentadbiran Ketua Menteri pada waktu ini.

“Semangat dan keinginan untuk merealisasikan segala yang tersurat dan tersirat di sebalik ledakan ini termasuk melalui pengisytiharan tarikh 22 Julai yang dilihat antara kaedah yang digunakan untuk diterjemahkan dan seterusnya diperkasakan secara komprehensif,” katanya menerusi satu kenyataan.

Beliau menambah, pengisytiharan Hari Sarawak juga seharusnya dilihat sebagai satu usaha langsung kepimpinan negeri untuk memastikan sejarah bebasnya Sarawak daripada pentadbiran asing diberikan pengiktirafan sewajarnya.

“Ini adalah satu tindakan yang bijak terutama bagi memberi kefahaman dan peringatan terutama kepada generasi muda yang berkemungkinan tidak begitu peka dengan sejarah di sebalik kefahaman asas hanya dalam konteks kemerdekaan nasional dan penubuhan Malaysia sahaja.

“Tidak dinafikan sememangnya tarikh 22 Julai sebelum ini tidak begitu diendahkan dan bukanlah satu tarikh yang begitu diketahui dan penting di kalangan masyarakat tempatan sendiri kerana ia tidak begitu diberi perhatian.

“Masyarakat seharusnya faham, pembebasan pentadbiran kuasa asing dari Sarawak sebenarnya layak diisyiharkan sebagai satu kemerdekaan. Justeru memang sewajarlah ia diiktiraf,” katanya.

Justeru, Mohd Fadzil menegaskan apa jua tafsiran dan pandangan, yang pastinya bagi setiap perjuangan yang berteraskan semangat patriotisme, ia harus diberikan pengiktirafan yang sewajarnya.

“Demikianlah juga dengan tarikh 22 Julai ini, jika tidak kerajaan dan rakyat Sarawak sendiri yang ke hadapan memberi pengiktirafan, siapa lagi yang akan mengiktirafnya,” katanya.